

INUIT ATAQATIGIIT

INATSISARTUNI



UPA2022/052

Maajip 24-at 2022

Mariia Simonsen

Kina kalaaliua – kalaallisut kinaassuseqarneq qanoq paasisarparput? Apeqquteqaat tunngavigalugu oqallississatut siunnersuut.

(Naleqqap Inatsisartuni ilaasortaatitai)

Naleqqap apeqquteqaat tunngavigalugu oqallississiaanut Inuit Ataqatigiinnit ima oqaaseqarniarpugut:

Oqallississiaq qulequtaqarpoq: "Kina kalaaliua – kalaallisut kinaassuseqarneq qanoq paasisarparput?".

Oqallississami tunngavilersuutit arlalissuupput, ilaatigut inuaassutsimut innuttaassutsimullu tunngallutik, nunat tamalaat aalajangersagaat inatsisillu arlallit attupillanneqarlutik. Matumani oqallississiap qulequtaa tunngavigissavarput.

Manna isumaqatigiissutigisinnaagunarpalput: Kalaallisut misigisugut tamatta kalaaliuvugut. Kalaaliunerput uummatitsinniippoq, kialuunniillu kalaaliunitsinnik arsaarsinnaanngilaatigut. Imaappoq: Kina kalaaliunersoq allanit aalajangersarneqarsinnaanngilaq, taama misigisup kisimi tamanna aalajangigassaraa. Kalaaliuneq kinaassusermut tunngaannarani inuaassusermuttaaq tunngavoq.

Naalagaaffit Peqatigiit inuit pisinnaatitaaffiinik aalajangersagai 1948-meersut naapertorlugit inuit tamatta pisinnaatitaaffeqarpugut inuiassuit akuerisaannik, ilaatigut qanoq inuaassuseqarnerluta nammineq aalajangissallugu,

INUIT ATAQATIGIIT

INATSISARTUNI



aalajangersakkallu tamakku Inuit Ataqatigiinni tunngaviulluinnartutut isigigaavut, atuuttuartussatullu isigalugit.

Inuaassuseq kalaallisut marloqiusamik paasineqartarpoq; inuaassuseq kinaanermik misiginermut tunngasoq kiisalu inuaassuseq nunami sumi najugaqarnermut tunngasoq. Kinaluunniit Kalaallit Nunaanni najugaqartoq inuiannut kalaallinut ilaavoq, taamaammallu Namminersorneq pillugu inatsimmi inuaat kalaallit pineqarput, taakkulu qinigaat - Inatsisartut - aalajangiisuussaapput Kalaallit Nunaat namminersulivissappat. Inatsisini tamakku aalajangersagaapput.

Qanormi iliussaagut namminersulivikkutta naalagaaffinngoruttaluunniit? Aalajangersakkat tamakku allangussappat?

Apeqqutit inuaassutsimut tunngasut tunngavimmikkut allangortinneqarnissaat Inuit Ataqatigiinni anguniagarinngilarput. Inatsimmik tunngaviusussamik suliaqaqqullugit Inatsisartunit isumalioqatigiissitanut apeqqutit tamakku ilanngullugit suliassiissutigineqarput. Siulittaasup akuerisinnaappanga issuaassaanga, issuaaneq aallartippoq: Tunngaviusumik inatsisissaq kalaallit kulturiannik, oqaasiinik kinaassusaannillu tunngaveqartumik sinaakkusorsorneqassaaq. Oqaluttuarisaaneq aallaaviulluni kalaallit kulturiat, kalaallit oqaasii kinaassusaallu akuunerulersitsiniarnermi tunngavigineqassapput, tassa nunap inoqqaavinit tunngavillit. Tunngaviusumilli inatsisissaq Kalaallit Nunaata killiffiani nalitsinni inuusut allatullu tunuliaquataqarlutik nunami najugaqartorpassuit eqqarsaatigilluinnarneqassapput." Issuaaneq naavoq.

Isumalioqatigiissitat suliaanni inuaat maani nunaqartut kalaaleqativullu nunani allani najugaqartut isummersoqataasariaqarput, taamaalilluta

INUIT ATAQATIGIIT

INATSISARTUNI



katersuuffigisinnaasatsinnik ukiorpassuarnilu atasinnaasunik
inatsiseqalerniassagatta tamatta toqqissismaffigisinnaasatsinnik.

Kalaaliuneq isummamit aalajangersimasumit kisarmaanneqarsinnaanngilaq. Kalaaleq eqqortoq imaluunniit kalaaliulluartoq kinaanersoq soqutigisaqaqtigiinnit suliniaqatigiinnilluunniit aalajangersimasunit aalajangersarneqarsinnaanngilaq – kalaaliunerput uummatitsinniippoq, kialuunniillu tamatuminnga arsaarsinnaanngilaatigut.

Oqallisssiami apeqquserneqarpoq kina kalaaliunersoq. Siunissami naalagaaffinngussagutta inatsisini aalajangersakkani lu kalaallit kalaaliunngitsullu immikkoortiterneqassagamik? Kalaallit kisimik naalagaaffinngortussami innuttaassuseqarsinnaassagamik? Taamaassappat kalaallip kinaanera tamatigoortorujussuarmik imartoорujussuarmillu nassuiardeqartariaqassaaq, sapinngisamik amerlanerpaat; kikkulluuunniit nunatsinnik inuinillu asannittut, nunani allamiut kalaaliusutut misigisimasut allallu nunami maani angerlarsimaffeqartutut misigisut, inuaqatigiinnik sullisserusuttut allarpasuillu maani nunaqartut nunaqanngitsulluunniit.

Ilisimassavarput kinaassuseq apeqquserneqaraangat inuit ilaannut misigissutsinik eqquisarmat. Kinaassuseq apeqquserneqaraangat ilaat immikkoortinneqartutut misigisarpugut, ilaluarineqartutut misigisarput, allaallu ajukkuttungortarlutik.

Inunniq taama immikkoortiterisoqarnissaa Inuit Ataqatigiinni kissaatigingilarput akuerisinnaanagulu.

Naggasiullugu Inatsisartunut maluginiaqqussavarput suliniaqatigiiffiit sisamat: meeqqat innarluutillillu pillugit oqaaseqartartut kiisalu naligiissitaaneq inuillu pisinnaaffii pillugit siunnersuisoqatigiit oqallisssiamut matumunnga

INUIT ATAQATIGIIT

INATSISARTUNI



ataatsimoortumik oqaaseqaateqarmata erseqqissaatigalugu inuk kinaluunniit
inuaassuseqarnissaminut pisinnaatitaaffeqarmat tamatumingalu
arsaardeqarsinnaanani, mianersoqqusippullu inuaassuseq, kinaassuseq
innuttaassuseqarnerlu imminut akulerussuunnaveersaaqqullugit.